

33.  
29  
DISSERTATIO MEDICA INAUGURALIS

De

# HYDROPE OVARII MU- LIEBRIS

Quam

ADSPIRANTE DIVINO NUMINE

*Consentiente Excellentissimo & Gratosissimo*

*Medicorum Ordine*

In Illustri Basileensium Academia

PRO LICENTIA

Summos in Medicina Honores, Insignia ac Pri-  
vilegia Doctoralia ritè consequendi

*Ad diem 13. Febr. MDCLXXXV.*

Publico Eruditorum Examini submittit

JUSTUS THEODORUS SCHORKOPFF

Hildef. Saxo.



---

BASILEÆ  
LITERIS JACOBI BERTSCHIL





# I. N. J.



*Ulamdiu in hoc mundo aspectabili  
vastum mare & flumina intra oras suas pla-  
cidè decurrunt, nihil quicquam accolis suis  
ferunt incommodi; simulac verò intumescunt  
& exorbitant, gravissimas sæpe inundatio-  
nes, & cum his innumeras calamitates cre-  
ant miseris. Non impari planè modo cum nostris sese res ha-  
bet corporibus, in quibus nullas ferè sentimus molestias, dum  
per vasa & viscera ritè & decenter movetur internum flui-  
dum, eoque minorem metuimus noxam, quò magis cætera,  
quod dici assolet, sunt paria: Sin motûs istius fluidi leges  
violentur, morborum seges & inprimis inundationes præstò  
sunt. Hinc mox totum corpus immergi undis, & modò hanc  
modò illam partem affligi, Medicorum quotidiana docet ob-  
servatio. Sæpius gutem ejusmodi Hydrops primo cuique in-  
tuitu apparet, qui tamen, abstrusiora loca si occupaverit,  
nebulam offundere facillimè potest medentium oculis, nec, ni-  
si plures morbi circumstantias exactè respicienti, probabili-  
ter, vel recluso demum post mortem corpore certò innotescit.  
Merentur hac procul dubio dici de Ovario Mulierum, quod  
si fata quoque sua experiatur, inque Hydropem incidat, non  
æquè manifesta hospitis sui præbet indicia, sed pro recondita  
situ sollicitam exposcit indaginem; siquidem difficilis est in-  
quisitu, licèt frequens, nec omnibus pariter obvi-  
us, ob pro-*



hibitam cadaverum copiam, è quibus peti per αὐτοψίαν posset. Neque enim Medico semper conceditur fraudulentam morborum malitiam, lususque lethiferos post agrorum obitum rimari, quàm avidè etiam hoc pacto ille aliorum commodis consulere, suumque simul sciendi desiderium explere satagat. Et, si tandem contingit, ut ad mortis examen curiosus admittatur, maturè nimis nondumque satiatus revocatur ab opere, de quo etiam conqueritur Kerckring. Spicileg. Anatom. Obs. LXXXII. cui per nimiam cognatorum misericordiam aliquando progredi non licuit, cum satis illi miseriorum defunctam exhaustisse dicerent, veriti forsàn, ne innocens Anatomes gladiolus aliquid adhuc adferret doloris. In duriores, dicamne an mitiores defunctæ cujusdam pagana cognatos nos nuper incidimus, qui, licèt eam tot morborum tædia degustâsse scirent, post fata tamen cultro Anatomico Magnif. Dn. D. HARDERI, P.P. & Sereniss. Princip. Bada-Durlac. Med. S. R. I. Nat. Cur. Pæon. & Illustr. Recuper. Patav. Socius Hospitis ac Patroni suspiciundi, non inviderunt. Et verò tunc inter alia observatione digna verum Ovarii Hydropem Thes. XV. recensendum conspeximus, cujus contemplatio ansam mihi dedit Theses hasce Inaugurales conscribendi. Faxit æternum Numen, ut omnia cedant feliciter!

## THES. I.

Dum verò Tractationem hanc aggredior, de Ovarii acceptione genuina pauca præmonebo. Ovarium muliebre Veteribus, sub vultu alieno apparuit, petitâ è corpore masculino analogia inter partes, quarum maxima structuræ est diversitas, quam tamen Modernorum perspicax industria glorioso ausu faventeque fortunâ detexit. Fregerunt glaciem Viri Excellentissimi, Stenonius, Kerckringius, Hornius, Grafius, aliique scrutatores indefessi, & pro antiquo testium nomine aliud



aliud suppeditârunt , proprium & subjecto huic magis  
conveniens. Cùm enim laudati Viri in omni fœmineo  
animalium genere, ovula, vel hisce quid analogum cer-  
nerent , & in ipso deinde homine vesiculas deprehen-  
derent nullis proprietatibus destitutas , quæ ad Ovorum  
essentiam pertinere videbantur , rectissimo jure dictas  
vesicas Ovulorum horumque promptuaria, Ovariorum  
nomine donârunt. Quæ quidem appellatio sub primis  
initiis locum apud omnes non invenit, majorem tamen  
per crebras Eruditorum observationes & profunda ab  
iisdem superstructa ratiocinia applausum acquisivit , ut  
pristinum Ovaria splendorem, quo per tot secula carue-  
rant, meritò recuperarent.

## II.

Neque verò dubium Ovis hisce nomen reddere  
amplius potest, quòd illorum figura à vulgaribus atque  
domesticis fortè abludat, cùm ista essentiam illorum mi-  
nimè constituat. Eodem modo nec cortex , quo aliquo-  
rum animantium ova munita excluduntur, ad hujusmo-  
di, qualia in Ovario muliebri videmus, complementum  
necessarius est: Viviparorum enim, cùm per Tubas Fal-  
lopianas ad uterum propellantur , blandis hîc excipiun-  
tur hospitiiis, ut duro ejusmodi involucro contra injurias  
externas non indigeant : sufficiunt iis tunicæ propriæ,  
quæ , licet tenuissimæ videantur , nobilissimum intus  
contentum liquorem satis custodiunt , & adolescente  
intra eas post fœcundationem susceptam Embryone,  
promptissimè extenduntur.

## III.

Præter allatas istas difficultates , siquidem hoc no-  
mine dignæ , quas contra Ovorum & Ovarii assertio-  
nem in Mulieribus urgent adversarii, aliæ fortè super-



sunt ejusdem momenti , quibus tamen , cum suâ sponte ruant , recensendis non immorabor. Certè si illi, quibus odiosa hæc sunt nomina, vel alitum saltem ovaria ovorumque germina, quæ & ipsi absque dubio concedent , inspiciunt , & infundibuli deinde cum oviductu situm ac connexionem , variaque quæ ibi accidunt phænomena considerant , indeque , ad Hominis interiores hæc partes atque maximam utrobique analogiam sepositis præjudiciis oculos vertunt , an negare adhuc Ovarii Ovorumque in humano genere existentiam , & de proprio , qui hinc emergit, usu ambigere possint , non video.

#### IV.

Verùm ut propius ad scopum accedam, Ovarii humani structuram naturalem hîc attingendam esse judico, quò præternaturalis dispositio in Hydropem dehinc facessens, hujusque generandi modus facilius pateat. Atque ut de situ primò nobis constet, notandum in Abdomine interiori, duorum plerunque digitorum transversorum distantia à fundo uteri , collocari unum in utraque parte Ovarium ; eo fortè subsidio Naturæ , ut deficiente uno alterum officio suo fungatur. Variare tamen allegatæ ab uteri fundo distantia terminus quandoque potest, atque inprimis in Gravidis, in quibus, quò superiorem locum occupat uteri fundus , eò magis descendit Ovarium , ceu quoque refert Graſius de Mulier. Organ. Cap. XII. Firmatur verò Ovarium beneficio ligamentorum latorum , utero vulgò adscriporum , quæ majori huic fulcro non sunt , quàm auriculæ Capiti, uti sæpius monuit Exc. Drelincourtius , Anatomicus Lugduni Batavorum dexterrimus.

#### V.

Si magnitudinem Ovarii spectemus , pro annorum gradu illa differt , quippe *in ætatis flore constitutis*  
*plerum*



*plerumque sesquidrachmam pendere, & succi pleniores esse, in provecioribus verò ac decrepitis minores, duriores & magis emarcescere, nunquam tamen evanescere, atque minimos Vetularum Testiculos adhuc scrupulum unum, in infantibus demum ac recens natis à granis quinque ad semis scrupulum ponderasse, notat laudatus Graevius l.c. Ut perfectio mirum sit, quòd in tantam molem Hydropicam in statu morbofo excrescere possint, ceu certa observationum fides inferius testabitur.*

## VI.

Cinguntur Ovaria integumento duplici, alio communi & à peritonæo oriundo, alio proprio, quamvis aliqui unicum illud esse malint, cum ægrè à se invicem secedant. Incisione secundum longitudinem cautè factâ non in Homine solum, sed etiam brutis, Vaccis, Ovibus, Scrophis, Porcellis Indicis, atque aliis, quorum copiam hætenus suppeditavit occasio, conspiciuntur Ovula plurima, majora, minora, media, concinno ordine disposita, mirâque fibrillarum membranarum congerie circumsepta ac intertexta, è quibus extricari illibata possunt, si cura quædam adhibeatur. Imò transparent sæpius per externam Ovarii tunicam Ovula hæc tot protuberantiis, quæ superficiem exteriorem alicubi inæqualem & gibbosam reddunt. Confundere autem Ovula ista non debemus cum Hydatidibus, quæ sæpenumero occupant Ovaria: distinguuntur hæc ab iis, quòd igni admotæ difficulter coctione indurescant. Præterea etiam tunicarum, quibus Ovula constant & Hydatides, vel stricta vel laxior connexio notam addit; illorum enim tunicæ operosè, Hydatidum verò facillimè disjunguntur, confirmantibus id ipsum experimentis, in hunc finem aliquoties institutis, ut alia signa non afferam, quæ toto eadem cœlo differre ostendunt.



## VII.

Est porrò aliud globulorum genus in Ovario advertendum, quod & ab Ovulis & Hydatidibus maximè discrepat, glandulosum scilicet, certis duntaxat temporibus tuberculi instar in extima parte prominens. Substantia hæc glandulosa, quæ colorem flavescentem plerunque præ se fert, ceu in vaccis sæpius vidi, sensim Ovo fœcundato accrescit, illudque undique comprimendo, per foramen in medio conspicuum, ut à Tubæ extremitate excipi commodè possit, extrudit: atque hinc rursus imminui tandemque evanescere solet. In fœminæ sex mensibus gravidæ, quæ post gemellorum partum perierat, testiculo sinistro observavit Syvammerdamius quasi quandam inflammationem, & præterea notabilem cicatricem, quâ divisâ, corpusculum heterogeneum subflavum & fibrosum, duplici foveolâ præditum, se obtulit, quia nempe Gemellos pepererat, notante Exc. Casp. Bartholin. Tr. de Ovar. Mulier. Et Ruy-schius Amstelodamensis Anatomicus curiosissimus recens gravidâ præter aperturam, ex qua elapsum erat Ovum, densam ibidem spongiositatem villis rubicundis obsessam, animadvertit. In Porca verò dictum corpus non flavi, sed ad fuscum quasi tendentis coloris nuper deprehendimus.

## VIII.

Ut verò ad Ova redeam, & de liquore, qui illis includitur naturaliter, aliquid dicam, hic ipse est, cui prima fœtus sua debet incunabula, & in quo altè sopita jacent Embryonis stamina, sive principia substantialia, quæ licet nudo Oculorum aspectui ruditer non offerantur, sui tamen præsentiam plurimas circa hoc negocium circumstantias colligentibus, seduloque pensitantibus, suspicari faciunt, quas longâ serie memorare hujus non est institui. Etenim nisi ista valeat hypo-



hypothesis, vereor, ne ad facultates, nescio quas plasticas, aliaque obscuriora nomina, quæ præoccupationibus exutæ menti hodie minùs fasificiunt, descendendum sit.

### IX.

Parvæ fateor molis est Ovarium, minoris in eo conclusa Ovula, ast minimæ in his pars essentialis cicatricula in recessu maxima, quæ tamen omnia suum augmentum, maturitatem, & ad subsequentem usum prolificum, aptitudinem ex Massæ sanguineæ convenientibus totque tortuosis circa Ovarium ductibus delatis particulis acquirunt, impressumque certo tempore à mare motum peculiarem suscipiunt. Neque dubitandum, quin sub legitima motûs hujus duratione, in liquore illo utut limpido & parte ejusdem nobilissimâ cicatricula abditissima futuri foetûs simulacra suscitantur, suscitata eruantur, factâque horum decenti evolutione mira partium accedat extensio, à succi nutritii in utero materno appulsu: quæ tandem membrorum connexio compositissima, in grandiolem foetûs molem faceffit, stupendum hoc opificium Divino præprimis digito dirigente.

### X.

Ad partium, quæ Ovarium constituunt, historiam pertexendam, vasa etiam spectant, quorum alia fluidum illi advehunt, alia idem in sanguinis Oceanum revehunt. Equidem vasa sanguinea arteriosa & venosa, nullus quod sciam, Ovario denegat, cum densa eorum congeries non saltem in exteriori parte hæreat, sed altius progressa minimis, ne dicam capillaribus, in ipsa Ovula ramificationibus spectaculo jucundissimo desinat; plures tamen novi, qui vasa lymphatica illi tribuere detrectant, vel, quod eadem non observant, vel, quod minùs necessaria huic loco esse autumant.



verum enim verò , si quid illis respondere liceat , firmiter mihi persuadeo, quòd eadem hîc, quæ in cæteris corporis partibus, per vasa lymphatica lymphæ resorbendæ urgeat necessitas. Cui sententiæ fidem affert, quòd ibidem in vaccis , scrophis , aliisque animalibus aliquoties dicta lymphatica manifestissimè conspexerim; quamvis non diffitear , me ista interdum , quocunque etiam studio quæfiverim, consequi nequaquam potuisse. Sed quæ lymphaticorum vasorum in statu naturali singularis hîc esse solet exilitas, imò filorum instar tenuissimorum vel minimùm recedente lymphâ facies , oculorum aciem facillimè eludit , inprimis quando sub dissectione non calent amplius cadavera, id quod venulis etiam sanguineis commune est , quæ in tepentibus adhuc membranis conspicuæ in refrigeratis sæpissimè evanescunt. Sufficit in Brutis circa Ovaria visâ à nobis esse vasa lymphatica , à quibus ad eadem in Homine quidnî argumentari liceret?

## XI.

Nèque tandem Nervis destituitur Ovarium , quos quidem à propaginibus plexûs mesenterici maximî furculis Nervorum vertebralium paris 20. & 21. occurrentibus accipit , cum quibusdam aliis ramulis , qui è pari vertebrali 22. derivantur. Atque per hos spiritus animalis jugiter accedit , cujus communio si alicubi in corpore , certè in hac parte nobili non minùs requiritur , si vel secretionem liquoris in Ovulo attentius considerare libeat , quod pluribus hîc adstruere non conabor.

## XII.

Consideratâ hoc modo breviter Ovarii acceptione verâ , ejusque fabricâ naturali , ad propositum illius affectum transeo , missâque Hydropis origine etymologicâ vulgò notissimâ , Hydropem Ovarii describo,  
quòd



quòd sit: Tumor à seri acris & copiosi, Ovula cum Ovario plus minùs evertentis, effusione oriundus.

### XIII.

Generis loco Tumor constituitur, quem ceu morbus in magnitudine aucta communem habet cum aliis Hydropibus, sive universalibus & totum corpus occupantibus, sive particularibus, ac hanc vel illam partem corporis invadentibus. Nullus enim absque tumore datur Hydrops, ad quamcunque etiam Classẽ illum referas, qui modò major, modò minor apparet, pro serie effusi copia aucta vel imminuta.

### XIV.

Maxima huic affectui cum Hydatidibus, de quibus etiam superius memini, pari frequentia hinc ac alibi occurrentibus, est affinitas: hæ tamen Hydropem dictum constituere potis non sunt, quamdiu pelliculis serum inclusum manet; cui patrocinari utique videntur, quæ laudatus Kerckringius l. c. obs. X. ex Tulpio proponit de Hydrope uterino Catharinæ Bonevalliae, cujus utrumque uteri cornu continuerat novem circiter aquæ purisquẽ libras: rectissime hinc, cum dicta aqua purulenta non in cavitate uteri fluctuaverit, sed inclusa fuerit innumeris vesicis, quarum nonnullæ in tunica uteri exteriori apparuerunt, subjungens: Audisne ex Hydatidibus fieri Hydropem; & tunc fieri quando rumpuntur, cognatum ergo Hydropi sunt malum, imò & sæpe ejus causa Hydatides, sed Hydrops non sunt. Inde mirari subit, quod in ipso Observationis limine idem Vir Exercitatiss. in puella quadam XX. annorum circiter Hydatidem se invenisse scribat, finistri locum Ovarii occupantem & magnitudine anserinum Ovum longè superantem, cum hæc ipsi vocata Hydatidis una saltem eoquẽ præcisè loco, quem sibi ibi vendicat Ovarium hærens, videatur testari, istud



quocunque tandem morbo corruptum fuisse & ex feri effusione à pristino statu in Hydropem potius Ovarii quàm Hydatidem illius locum occupantem degenerasse. Sanè, si serum ibi Ovarii integumentis inclusum fuit, de quo tamen satis certi ex Historia fieri non possumus, ipsius partis Hydropem adfuisse, pace tanti viri dicendum omnino reor, secus autem, si in pelliculis strictè dictis serum substitit. Neque his officere potest, si præter Ovarii integumenta, & in his fluctuantem aquam istius partes constitutivas internas non deprehendit Cl. Autor, cum hæc d. diuturnâ inhabitantis aquæ stagnatione & adauctâ hinc ejusdem acrimoniâ penitus tandem deleri & eradicari potuerint: uti nupera nos observatio docuit in Rustica, quam prolixius jam exhibiturus sum.

## XV.

Fuit dicta Rustica, referente Magnif. D. D. HAR-  
DERO, qui illam tractârat olim, annorum 40. circiter, oneri, dum viveret, ponderoso, ferendo assueta, & quæ triennio ante obitum, cum menstrua deficerent atque hypogastrium intumesceret, gravidam se credidit. Ab illo tempore doloribus variis circa femoris præcipue sinistri cum Ischio articulationem affligi cœpit, succedente primò hujus & pedis dicti lateris Atrophiâ dolorosa, postea ipsius intumescentiâ enormi, manentibus impressorum digitorum vestigiis, ac tandem accedentibus lumborum lancinationibus & urinandi difficultate, ut cæteros, quibus diu fuit divexata, cruciatus taceam. Opposita his fuere remedia, quæ medendi methodus requirere potuit, & immensa aquarum copia ex pede tumido repetitis scarificationibus elicitâ, malo nihilominus crescente & exitium paulatim inferente. Examini Anatomico cum nos accingeremus, aperto nondum Abdomine, tumor statim apparuit re-  
nitens



nitens in Hypogastrii latere sinistro cum aliqua inæqualitate rotundus, qui ipse Gravidatis suspicionem viventi moverat, quam tamen erroneam fuisse penitior nobis inspectio detexit, quandoquidem in pelvi deprehendimus Ovarium sinistrum aquâ subsalsâ foetente limpidissimâ, ad lib. ij. medicas circiter turgidum, deletis Ovarii interioris vestigiis omnibus, quamvis exterius vasis adhuc elegantibus ornaretur. Annexam porro huic Ovario Hydropico animadvertimus secundum medietatem Tubam Fallopianam, cum extremitate foliacea; in altero autem latere Ovarium marcidum, notabili Hydatide obsessum, quæ omnia ex cadavere exemta inter curiosa sua asservat sæpe laudatus D.D. HARDERUS.

## XVI.

Modica adhuc fuit ista aquæ quantitas, si ad exempla attendamus, quæ Ampliff. D. D. Wepferus, diversorum S. R. I. Principum & Reip. Scaphus. Archiater Excellentissimus, Patronus venerandus, benevolè mecum communicavit, duarum foeminarum, quæ affectu hoc detentæ singulæ post mortem ultra lib. CXX. feri exhibuerunt, & vetulæ cujusdam sexagenariâ majoris, quæ Tumorem in Ovario gestavit mole & contentorum copiâ his majorem ultra XX. annos, nec tamen ab hoc, sed à Pleuritide, malè tractata, diem suum obiit. Imò novit idem Vir celeberrimus, aliquot adhuc matronas superstites tales in ventre tumores fovere, capite virili majores, qui pilæ magnæ instar hinc inde manus impulsu truduntur, cujusmodi sequens illius est historia: Foemina quædam XXXIX. annorum benè colorata, quinque annis maritata, primâ vice gravida concitatus ivit: ruptum fuit Chorion, multumque aquæ profudit, quamvis nullus adfuisset pariundi conatus, nihilominus urgebatur ad partum, post d. tertium



peperit infantem macilentum admodum. In tertia septimana puerperii globos duos in Abdomine, unum majorem, alterum minorem, oberrantes & permolesto percepit: cum levamine sequebatur largissimus fluxus Lochiorum. Secundâ vice gravida foetum sanum peperit: à tribus annis non concepit. Menses ordinatè hæcenus fluxerunt: decem diebus ante fluxum animadvertit solummodò maculas, nunc rubras, nunc pallidiores, etiam flavas, quas sequitur mensium fluxus per dies 2. vel 3. largus. Fluor albus molestus est cum tenesmo, aliquando per dies octo subsistit. A XV. mensibus observavit Tumorem in Hypogastrio sinistro, putavit se gravidam esse, nihilominus menses ritè fluxerunt: semel per septimanas sex vel octo subsisterunt, unde magis confirmabatur in sua opinione: in principio nullam molestiam peperit, nisi in scalarum ascensu, tunc enim impulsus quendam sensit, non tamen dolorificum: à 3. mensibus in scalarum ascensu magis impedimento fuit. Ante mensium fluxum 4. diebus intolerabiles dolores passa est: quamdiu menses fluxerunt, erant lancinantes, pungentes, urentes, videbatur culter in Tumore circumagi: diu noctuque nulla quies concedebatur, nec decumbere nec deambulare præ dolore licebat: in dorso & hypogastrio affligebat alternatim &c. Cùm examinaret Tumorem laudatus D. D. Wepferus. in supina totum Hypogastrium sinistrum occupavit, intra cavum abdominis contentus ossi Iliaco accubuit, ossi pubis incubuit, ægrè mobilis videbatur: in latus decubuaè versus dextrum hypogastrium declinavit, ac mobilior & planè circumscriptus tangebatur, rotundus cum aliqua inæqualitate, durissimus, magnitudine capitis infantilis.

## XVII.

Aliam Hydropis Ovarii historiam à sæpius laudato



to D. D. Wepfero suppeditatam, notatu dignissimam, recensebo, quæ à superioribus propter contentorum diversitatem discrepat. Illa, autem, ipsissimis Excell. Autoris verbis ita se habet: Fœminæ cuidam Rusticæ ex Lochiorum suppressione sensim primùm Hypogastrium intumuit, ut gravida crederetur, etiam post obitum mariti peste 1629. occumbentis: indies augebatur moles, ut monstrum alere, agricolæ putarent. Vixit, utcunque satis commodè, ac rusticis operibus præter fidem strenuè vacavit: menses statò tempore, quantitate debitâ, benè colorati ad annum ætatis quinquagesimum ritè fluxerunt: à frigore aliquoties passa est symptomata hysterica: aliquando ichor foetidus ex sinu pudoris emanavit, quod uteri procidentia tribuit, nam adultior nihil horum amplius animadvertit. Anno 1660. sub finem Septembr. correpta fuit Pleuritide, morbum neglexit, à vino in principio non abstinuit, omnia medicamenta respuit: d. 17. Octobr. mortua est. die 18. Octobr. aperto abdomine molis ingentis Tumor in Hypogastrio & altius occurrit, accrevit omento & aliquot in locis peritonæo: ambabus manibus attractus facile sequebatur, nam nec peritonæo nec omento validè adnatus fuerat: illo sinistrorsum declinato uterus parvus, ut in vetulis esse solet, apparuit, Ovariumque dextrum prorsus naturaliter cum omnibus ad illud pertinentibus se habebat. Tumorem à ligamento lato sinistro crassissimo pendentem abscidi, in ligamento nullum vestigium Ovarii inveni, nec in Tumore: Tuba Fallopiana accubuit illi amplior. Tumor foris æqualis ferè fuit & lævis, albicans, rubebat palmi amplitudine, ubi peritoneo in sinistro latere incubuit, fauciatus cultello, effudit aquam turbidam, sup pallidam, similem sero caprino, aut cerevisiæ albæ, foetore virulento, instar seminis aut atriplicis foetidæ præditum. Quantita-

tem



tem feri copiam aquæ nequii metiri ob mensurarum defectum in tugurio rustico, ex vase tamen ligneo quo excipiebatur, credebatur mensuras X. feri lib. XXX. multum superasse. Dum aqua ex vulnere emanavit, simul eruperunt globuli subflavi, cerasi sylvestris magnitudine, pauci majores, nulli minores, friabiles instar vitorum ovorum ad duritiem cocti, ex lamellis similis constitutionis compositi, intus continentes nucleum quoque friabilem; levés erant & aquæ innatabant, facile flammam concipiebant; spatulæ instar Emplastri mollioris linteo induci potuerunt, adusti fetorem spirabant similem illi, quem oleum ovorum fortius adustum edere solet: ponderabant gr. V. plerunque VII. paucissimi X. Inveni quoque duas pilas pilosas, quarum una ex meris pilis composita erat, foris laxius, in centro densissime complicatis: exsiccata quadrangula ferè evasit, cum antea rotunda esset, ponderabat Dr. j $\beta$  cum aliquot granis: altera æquè rotunda mediocris Ovi magnitudine, minus in superficie pilosa; inter pilorum interstitia hæsit substantia globulorum similis, ponderosior primâ: nam duas drachmas pondere superavit; siccata suam rotunditatem retinuit. In superficie tumoris interna finulos aliquot inveni ac hinc inde accreta corpuscula figurâ, colore & magnitudine sem. milii similia, quasi semina globulorum futura. Tumoris tunica, similis ventriculo humano mediocriter distento, siccata quâvis vesicâ bubulâ crassior mansit.

### XVIII.

Præmissis ita Historiis aliquot è vivis pariter ac defunctis petitis ad causarum affectus propositi explanationem me accingo, è quibus quamvis plures accusari possint, potiores saltem colligam. Efficiens proxima & immediata videtur esse vasorum lymphathico-  
rum



rum Ovarii ruptio, ad quam recipiendam ipsorum teneritas est promptissima. Causa continens serum est ibi collectum, quod cum revehi in sanguinem deberet, ob solutionem continui continuè effluit, intercipitur, inque Ovario relinquitur, quo deinceps impletum in molem Hydropicam, plus minùs insignem, exsurgit. Neque enim unico quasi ictu Hydropem Ovarii generari dicerem, cum vasorum lymphaticorum, ibidem, observata exilitas illud non suadeat, utpote quæ susceptam oscillis suis lympham è proximo vulnere, brevi rursus dimittunt. Quod ipsum confirmant, observationes superiores, in quibus animadversum est, Ovarium, post menses demum & annos plures ad tantum devenisse incrementum.

### XIX.

Inter causas antecedentes referenda inprimis est feri sanguini immergi depravata, constitutio, quâ vel quantitate peccat, vel qualitate. I. Quantitate, dum glandulis ut plurimum in corpore, affectis & ab officio suo desciscientibus, in sanguine, suspensum tenetur, dictum serum, & majori deinde, copiâ ad Ovarium, defertur, quàm ut resorberi commodè possit. Atque sic lymphatica vasa, simul obruuntur, & facilis ad Hydropem via, sternitur. II. Qualitate, quando ex prægressis morbis chronicis, potissimum illis, qui latissimo Hystericorum & Cachecticorum nomine, vulgò veniunt, visciditate niminâ irretitur, vel acrimoniâ quâcunque scatet, è quibus hæc erosionum, illa obstructionum mater est frequentissima; si verò conspirent, ac vi unitâ agant, longè facilius malum accelerare, & miram, sæpe, illam partibus in Ovario hærentibus anomalam affricare, possunt. Quod ipsum dum contingit, Ovulorum liquor pervertitur, & insculpta huic cicatricula, pretiosa, destruitur, adeo ut, si fato huic singula, quod

C

quidem



quidem fit facillimè , Ovula succumbant , metus sterilitatis certissimus immineat. Nec minùs culpanda hìc est ipsius Ovarii conformatio vitiosa & textura debilior, siue nativa fuerit ista, siue adventitia, unde quæ ibi sanguinis & lymphæ in vasa sua secretio fieri debebat, non ritè peragitur, & compages istius antea infirma levi accedente adjumento morbofo dirimitur. Denique frequens abortiendi necessitas malo huic succrescendi viam aperit, & partus difficiles, qui cum hæmorrhagiis uteri conjuncti esse amant.

## XX.

A causis externis maxima nocumenta in Ovarium sæpenumero redundant : quales sunt omnes Abdominis contusiones, fortiores constrictiones, onerum ponderosorum gestationes frequentiores, casus ab alto, motus excessivi omnes, & ejusmodi alia, quæ, qui volet, huc referre poterit; quamvis enim ab his solum exteriores partes sentire noxam videantur, facile tamen hæc ad interiores quoque propagatur. Spectant isthuc inprimis laboriosi obstetricum temeritate vel imperitiâ intempestivè injuncti nifus; in his enim Diaphragma subjectas partes uterumque arctius premendo, adjuvantibus musculis abdominis undique incumbentibus, premit simul tenellum ad latera situm Ovarium, quod inde variis modis distorquetur, laceratur, labemque postmodum Hydropicam non rarò suscipit. His omnibus subjungendi sunt in Diæta, nec non Catameniorum & Lochiorum fluxu commissi errores, quos cum cætera in corpore viscera tum suo damno Ovarium luit.

## XXI.

Signa diagnostica difficultate non carent, nec nisi plura collecta & inter se collata, de affectu isto sufficienter testantur, id quod in superioribus casibus palam



lām fit. Quare pauca hīc repetere sufficiat. I. est, si Tumor occurrat in Hypogastrii ididemque siti Ovarii latere alterutro renitens, cum aliqua inæqualitate, rotundus. II. Si iste post difficiliora inprimis puerperia, sensim sensimque augeſcat. III. Si pro vario in alterutram partem decubitu mobilior deprehendatur & planè circumscriptus. IV. Si offi iliaco accumbat & offi pubis incumbat cum urinæ difficultate & difficili inſeſſu; ægrota inſuper ſub ſcalarum aſcenſu impulſum in eas partes ſentiat citra graviditatis ſigna & ſuſpicionem.

## XXII.

Dictorum ferè ſignorum ope affectus noſter ab aliis diſtingui poteſt, & quidem I. ab Aſcite, in quo totus ubique venter tumidus cum fluctuationis ſenſu percipitur, ſuccedente, tandem febris à ſero in Abdomine, ſtagnante & viſceribus, hinc ſanguini labem febrilem fortiùs imprimente, cum è contra in Hydrope Ovarii ſuo effuſum ſerum folliculo includatur, neque febris ita, facile concitetur. II. à tympanite, in quo pariter totum abdomen tenſum eſt inſtar tympani, ſonum à percuffione relinquens. III. ab hydrope uteri, cum in hoc menſium fluxus non obſervetur, qui tamen in Hydrope Ovarii non infrequens. IV. à tubarum Hydrope, figuræ diverſitate, quam ſemicircularem notavit Excell. D. D. Brechtſfeld in Act. Haſn. ann. 72. p. 194. V. à ſcirrho meſenterii, in quo major, durities, qualem in cadavere, ſcæmineo pugnum maximum ſuperantem & ad lapideam, quaſi ſoliditatem accedentem Pariſiis videre, licuit. VI. à meſenterii abſceſſu, non ſolùm propter, mollitiem, ſed quòd hujus vel comes vel ſoboles fluxus cœliacus, celerque hīc ad Tabem tranſitus in propinquo eſſe, ſoleat. VII. à liene magno, qui haud obſcurè in Hypochondrio ſiniſtro tangi



trudique hinc inde manu potest, si vel maximè excre-  
scat; raro enim contingit, ut descendat in locum hypo-  
gastrii inferiorem, quod semel observavit Parisiis su-  
prà laudatus D. D. Drelincourtius in muliere, quæ ex  
hinc utero se gestare cum Medicis crediderat. VIII.  
à graviditate, in qua tumoris circa umbilicum est emi-  
nencia, ut de infantis motu manifesto, quem matres  
percipiunt, nihil dicam. IX. à mola, qua ponderis  
instar inutilis ab uno latere in oppositum devolvitur,  
cui addimus mensium subsistentiam, & præcedanea  
conceptionis indicia.

### XXIII.

Signa Prognostica eventum morbi respiciunt,  
qui per se lethalis non est, ceu istud confirmat historia  
vetulæ illius Th. XVI. adducta, quæ ultra XX. annos  
malo isto laboraverat, non ab hoc sed à Pleuritide ne-  
cata. Et sanè si cadavera consulamus, quæ Ovarium  
hydropicum exhibent, in his cæterorum simul visce-  
rum morboſa constitutio deprehendi solet, ut mors non  
præcisè ab illo, sed aliunde deduci possit ac debeat. In  
alios tamen degenerare morbos solet, imò in ascitem  
quoque, quando ad tantam plenitudinem attollitur O-  
varium, ut medium crepet, atque tunc aquam in abdo-  
minis cavum deponat. Talem meminit casum sæpi-  
us laudatus D. D. Wepferus de fœmina quadam post  
vomitum enormem Hydropica factâ, in qua in venerat  
Ovarium mole majus mireque lacerum, ex quo aquam  
in ventrem effluxisse verosimiliter colligit. Præterea  
malum sterilitatem minitatur, interdum plenariam, si  
utrumque Ovarium affici cœperit, morbum si non cu-  
rabilem, saltem tolerabilem.

### XXIV.

Investigatis hætenus Causis & expositis signis,  
quibus affectus iste dignosci solet, ad Curationem pro-  
pero



pero secundum Indicationes & Indicata instituendam. Ex illis Curatoria, feri in Ovario stabulantis evacuationem: Præservatoria ejus in corpore, imminutionem & correctionem: & Vitalis virium conservationem, postulat.

### XXV.

Satisfit hisce auxiliis e tribus fontibus, Chirurgico, Pharmaceutico & Diætetico petitis. Ex priori occurrere morbo statim videtur Paracentesis, sive acupunctura, solenne alias Asciticorum remedium, si legitime absente viscerum corruptela instituatur, cum alioquin post istius usum occumbere ægri sæpe soleant: cura tamen ista etiam anceps hinc est, quamvis enim serum hoc pacto eliciatur, brevi tamen rursus succrescit, & frustraneam operationem reddit; si verò tunicæ ab extracta aqua collabuntur, putredinem facile concipiunt vicinis partibus exitium minantem. Majorem afferret medellam ipsius Ovarii per sectionem extirpatio, nisi crudilis & majori cum periculo conjuncta videretur. Unde palliare morbum potissimum oportebit V. S. scarificationibus, fonticulis, quibus feri imminutionem aliquam utcunque adipiscimur.

### XXVI.

E Pharmacia desumuntur evacuantia & alterantia, atque ex istis primò purgantia, quæ tamen leniora esse debent ad serum in corpore abundans detrahendum, & majus morbi incrementum impediendum citra sanguinis nimiam fusionem; hæc enim si concite-  
tur, magna quidem feri copia excernitur, non exigua tamen ex illa massæ sanguineæ solutione Ovario iterum suffunditur.

### XXVII.

Par ratio est sudoriferorum, è quibus hinc mitiora profunt, vehementiora nocent. Atque eo nomine



suspecta in Hydroke Ovarii Exc. D. D. Wepfero videntur decocta lignorum e. gr. Guajaci & ejusmodi alia.

### XXVIII.

Diuretica in affectu hoc fructu non carent, quæ ferum blandè per vias urinarias educunt, qualia sunt Rad. ononid. asparag. fœnic. pimpinell. urtic. ering. Folia scord. chamæp. eupator. &c. sem. fœnicul. anis. mil. fol. saxifrag. Spir. sal. sal tartari vitriolat. & plura alia, quorum tanta apud Practicos farrago, ut eam repetere, minus in formulas redigere, opus esse non judicem.

### XXIX.

Inter alterantia quoque conducent medicamenta aperientia, incidentia aliæque feri nimix visciditati tollendæ destinata. Porro martialia, quæ vitiosos in corpore succos absorbendo, sanguinem admodum corrigunt & obstructionibus ansam adimunt, quæ vel sola adhibere vel combinare cum aliis, pro symptomatum quæ adsunt, vel morbo superveniunt, circumstantia & varietate prudens Medicus novit.


### XXX.

In Diæta vitentur potus nimius, ciborumque viscidorum quorumcunque, fructuum crudorum & acetariorum, quibus maximopere delectari solent mulierculæ, ingestiones, motus & exercitia vehementia cum animi gravioribus pathematis, aliavè, quorum suprà Th. XV. mentio facta fuit.

*Atque hisce ut acquiescas, Benevole Lector, est quod enixè efflagitio, nec enim cum observationibus propriis, tum judicii præprimis maturitate destitutus, adhuc prolixius de singulis disserere potui: præstiturus forsân illud, ubi ἐμπειρία major accesserit. DEO interim immortalî pro clementi suo auxilio*

SIT LAUS ET GLORIA.





Ad  
Pereximium Dn. CANDIDATUM.



*Bdita Natura scrutari sedulus  
insta,  
Atque Asclepiadis dignus alum-  
nus eris!*

Nobiliss. Dn. CANDIDATO, Convictori  
suo honor. l. p.

J. JACOB. HARDERUS, Ph. & Med. D.  
P. P. Sereniss. Princ. Durlac. Med. S. R. I. Acad.  
Nat. Cur. & Patav. Illustr. Recuper. Socius, Acad.  
p. t. Rector.

*FINIS.*





